


# Sa metamòrfosi de s'arrana




## SU CONCHEMALLU

Conchemallu (girino in italianu) est su nòmini de certus anfibius comenti a is arranas candu funt piticus, deretus de nàsciri. Is arranas funt anfibius, poita bivint siat in sa terra, siat in s'àcua. Anfibiu, difatis, est unu fueddu chi benit de su grecu antigu ἀμφί, ca bolit nai "dòpiu", e βίος, ca significat "vida".

## Sa carena (Su corpus)

Su conchemallu assimbillat a unu pisci piticheddu. Tenit una conca manna, ca parit unu mallu, acantu ddui funt totu is òrganus vitalis, e una coa chi ddi serbit po si movi in s'àcua. Po respirai impreat is brànchias comenti a is piscis etotu.



## S'habitat (Su logu acantu bivit)

Is conchemallus s'agatant in logu de pauli, in is stàinus e in s'àcua arresia (firma) de is putzus o de is piscinas, ma fintzas in is arrius de is montis prenis de erba chi papant po bivi.

## Sa metamòrfosi (Su mudamentu)

S'arrana ciat unu muntoni de ous totu paris. A pustis de duas cidas is ous s'aberint e is conchemallus ndi

essint a foras, ma sighint a bivi totus in su pròpiu logu e candu si movint ddu faint unius po si difendi.

Cun su tempus incumentzat sa trasformazioni: essint is peis de nanti e si svilupant is prumonis. Poi essint is peis de fatu e passat de vegetarianu a carnìvuru. De custu momentu su conchemallu est un'arrana fata.